

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՎԵՐԱՀՍԿԻՉ ՊԱԼԱՏ



ԸՆԹԱՑԻԿ ՀԱՇՎԵՏՎՈՒԹՅՈՒՆ

ԵՎՐԱՍԻԱԿԱՆ ՏՆՏԵՍԱԿԱՆ ՄԻՈՒԹՅԱՆ ԲՅՈՒՋԵԻ ՄԻՋՈՑՆԵՐԻ ՁԵՎԱՎՈՐՄԱՆ, ԿԱՌԱՎԱՐՄԱՆ ՈՒ ՏՆՕՐԻՆՄԱՆ, ԵՎՐԱՍԻԱԿԱՆ ՏՆՏԵՍԱԿԱՆ ՄԻՈՒԹՅԱՆ ԳՈՒՅՔԻ ԵՎ ԱՅԼ ԱԿՏԻՎՆԵՐԻ ՕԳՏԱԳՈՐԾՄԱՆ ՆԿԱՏՄԱՄԲ ԻՐԱԿԱՆԱՑՎԱԾ ՀԱՄԱՏԵՂ ԱՐՏԱՔԻՆ ԱՌԻԴԻՏԻ (ՀՍԿՈՂՈՒԹՅԱՆ) ՎԵՐԱԲԵՐՅԱԼ

Վերահսկողության հիմքը

«Եվրասիական տնտեսական միության մասին» 2014 թվականի մայիսի 29-ի պայմանագրի 22-րդ հոդվածը, «Եվրասիական տնտեսական միության մարմիններում արտաքին աուդիտի (հսկողության) մասին» 2015 թվականի հոկտեմբերի 16-ի թիվ 33 Հիմնադրույթը, Եվրասիական տնտեսական միության անդամ պետությունների բարձրագույն վերահսկողական մարմինների կողմից հաստատված համատեղ վերահսկիչ միջոցառում անցկացնելու 2017 թվականի արտաքին աուդիտի (հսկողության) պլանը, «Վերահսկիչ պալատի մասին» ՀՀ օրենքի 10-րդ հոդվածի 10-րդ մասի գ) կետը և Վերահսկիչ պալատի խորհրդի 2017թ. հուլիսի 25-ի թիվ 13/2 որոշումը:

Վերահսկողության նպատակը

Եվրասիական տնտեսական միության մարմիններում (այսուհետ՝ ԵԱՏՄ մարմիններ) բյուջեի միջոցների ձևավորման, կառավարման ու տնօրինման, Եվրասիական տնտեսական միության (այսուհետ՝ Միություն) գույքի և այլ ակտիվների օգտագործման արդյունավետության նկատմամբ հսկողական միջոցառման իրականացում:

Վերահսկողության առարկան

ԵԱՏՄ մարմիններում բյուջեի միջոցների ձևավորման, կառավարման ու տնօրինման գործընթացներ, Միության գույքի և այլ ակտիվների օգտագործում:

Վերահսկողության օբյեկտները

ԵԱՏՄ անդամ պետությունների մարմիններ՝

Եվրասիական տնտեսական հանձնաժողով (ք. Մոսկվա)

Եվրասիական տնտեսական միության դատարան (ք. Մինսկ)

Վերահսկողությամբ ընդգրկված ժամանակահատվածը

2016 թվականի հունվար-դեկտեմբեր ամիսներ և 2017 թվականի 1-ին կիսամյակ:

Վերահսկողության կատարման ժամկետը

2017 թվականի օգոստոսի 28-ից մինչև սեպտեմբերի 29-ը ներառյալ:

Վերահսկողության մեթոդաբանությունը

Վերահսկողության իրականացման ընթացքում կիրառվել են դիտարկման, ստուգման և վերլուծության ձևերը, ինչպես նաև՝ ԵԱՏՄ մարմիններում արտաքին աուդիտի (հրսկողության) մասին թիվ 33 Հիմնադրույթով սահմանված հետագա, ընթացիկ և նախնական աուդիտներով իրականացված ֆինանսական, համապատասխանության, արդյունավետության վերահսկողության տեսակները:

Վերլուծության փուլում վերլուծվել և ամփոփվել են ստուգման արդյունքները:

ՎԵՐԱՀՍԿՈՂՈՒԹՅԱՆ ԱՐԴՅՈՒՆՔՆԵՐԸ

Համադրելի վերահսկողական աշխատանքների վերաբերյալ

2017 թվականին աշխատանքների պատասխանատու է հանդիսացել Բելառուսի Հանրապետության պետական հսկողության կոմիտեն

Ղեկավարվելով «Եվրասիական տնտեսական միության մասին» 2014 թվականի մայիսի 29-ի պայմանագրի 22-րդ հոդվածի, Եվրասիական տնտեսական Բարձրագույն խորհրդի

2015 թվականի հոկտեմբերի 16-ի թիվ 33 որոշմամբ հաստատված Եվրասիական տնտեսական միության մարմիններում արտաքին աուդիտ (հսկողություն) իրականացնելու մասին Հիմնադրույթի (այսուհետ՝ Հիմնադրույթ) ԵԱՏՄ անդամ պետությունների բարձրագույն վերահսկողական մարմինները Միության բյուջեի միջոցների ձևավորման, կառավարման ու տնօրինման, Միության գույքի և այլ ակտիվների օգտագործման արդյունավետությունը որոշելու նպատակով 2017 թվականին համատեղ արտաքին աուդիտ (հսկողություն) են իրականացրել ԵԱՏՄ մարմիններում՝ Եվրասիական տնտեսական հանձնաժողովում և Եվրասիական տնտեսական միության դատարանում (այսուհետ՝ ԵԱՏՄ դատարան):

Համաձայն Հիմնադրույթի 36-րդ կետի՝ արտաքին աուդիտի (հսկողության) կազմակերպման մասով գործունեությունը ռոտացիոն կարգով համակարգվում է պետական ֆինանսական վերահսկողության պատասխանատու բարձրագույն մարմնի կողմից մեկ օրացուցային տարվա ընթացքում՝ ըստ Միության անդամ պետության անվանման ռուսերեն այբբենական հերթականության: 2017 թվականին նշված աշխատանքների պատասխանատու է հանդիսացել Բելառուսի Հանրապետության պետական հսկողության կոմիտեն, որը կազմակերպել և համակարգել է այդ աշխատանքները:

Հիմք ընդունելով Հիմնադրույթի 37-րդ և 43-րդ կետերը՝ ԵԱՏՄ անդամ պետությունների բարձրագույն վերահսկողական մարմինների կողմից համատեղ վերահսկողական միջոցառման իրականացման նպատակով 2017 թվականի մարտի 16-ին հաստատվել է արտաքին աուդիտի (հսկողության) 2017 թվականի պլանը, 2017 թվականի օգոստոսի 15-ին հաստատվել են վերահսկողական

աշխատանքներն իրականացնող տեսուչների անհատական կազմը և միջոցառման անցկացման ծրագրերը, ինչպես նաև նշանակվել է տեսուչների խմբի ղեկավարը:

Արտաքին աուդիտի (հսկողության) 2017 թվականի պլանի համաձայն, Միության անդամ պետությունների բարձրագույն վերահսկողական մարմինների կողմից վերահսկողական միջոցառումները 2017 թվականի օգոստոսի 28-ից մինչև սեպտեմբերի 6-ն իրականացվել են ԵԱՏՄ դատարանում և սեպտեմբերի 7-ից 30-ը՝ Եվրասիական տնտեսական հանձնաժողովում:

Վերահսկողական միջոցառումների ընթացքում Եվրասիական տնտեսական հանձնաժողովում և ԵԱՏՄ դատարանում Եվրասիական տնտեսական միության 2016 թվականի բյուջեի կատարման հետագա աուդիտի և Եվրասիական տնտեսական միության 2018 թվականի բյուջեի ձևավորման նախնական աուդիտի իրականացման ընթացքում կազմվել են համապատասխան արձանագրություններ (ակտեր), ինչպես նաև կամերալ ուսումնասիրությունների ձևով իրականացվել է 2017 թվականի առաջին կիսամյակում Եվրասիական տնտեսական միության բյուջեի կատարման ընթացիկ աուդիտ, որի արդյունքներով կազմվել են համապատասխան եզրակացություններ:

Համարեղ վերահսկողական արդյունքների ամփոփմանն ուղղված աշխատանքներ

Հիմնադրույթի 59-րդ և 61-րդ կետերով սահմանված է, որ հետագա աուդիտի, ընթացիկ աուդիտի և նախնական աուդիտի իրականացման արդյունքներով, միջոցառումների անցկացման արդյունքների հիման վրա կազմված ամփոփիչ հաշվետվությունները տեսուչների խմբի ղեկավարի կողմից ուղարկվում է պատասխանատու բարձրագույն վերահսկողական մարմին, հետագայում դրանք պետական ֆինանսական վերահսկողության բարձրագույն մարմինների համատեղ քննարկմանը ներկայացնելու և հաստատելու համար:

2017 թվականին ԵԱՏՄ մարմիններում իրականացված արտաքին աուդիտի (հսկողության) արդյունքներով տեսուչների խմբի կողմից կազմված ամփոփիչ հաշվետվություններն անցել են համաձայնեցման փուլը և ըստ գործող կարգի, Բելառուսի Հանրապետության պետական հսկողության կոմիտեի կողմից, որպես 2017 թվականին ԵԱՏՄ մարմիններում արտաքին աուդիտի (հսկողության) իրականացման պատասխանատու բարձրագույն վերահսկողական մարմին,

պետք է ներկայացվի ԵԱՏՄ անդամ պետությունների բարձրագույն վերահսկողական մարմինների համատեղ հաստատման:

Տեսուչների խմբի ղեկավարի ստորագրությամբ հաշվետվությունները, 2018 թվականի մարտի 22-ի դրությամբ, պետական ֆինանսական վերահսկողության պարասխանապրու բարձրագույն մարմնի կողմից պետական ֆինանսական վերահսկողության բարձրագույն մարմիններին, այդ թվում՝ ՀՀ վերահսկիչ պալատին, պաշտոնապես հաստատման դեռևս չեն ներկայացվել:

Բացի այդ, համաձայն Հիմնադրույթի 62-րդ կետի, ձևակերպված ամփոփիչ հաշվետվությունները ԵԱՏՄ պետական ֆինանսական վերահսկողության բարձրագույն մարմինների, այդ թվում՝ ՀՀ վերահսկիչ պալատի կողմից քննարկվելուց հետո, համատեղ որոշումներով հաստատվում և համապատասխան որոշումների նախագծերի հետ միասին ներկայացվում են Եվրասիական տնտեսական բարձրագույն խորհրդի (այսուհետ՝ Բարձրագույն խորհուրդ) քննարկմանը:

Նկատի ունենալով վերոգրյալը, հիմք ընդունելով Հիմնադրույթի 4-րդ կետի 14-րդ պարբերության, «Իրավական ակտերի մասին» ՀՀ օրենքի 38-րդ հոդվածի 1-ին մասի, Հիմնադրույթի 70-րդ կետի դրույթները՝ «Հայաստանի Հանրապետության վերահսկիչ պալատի մասին» ՀՀ օրենքի 20-րդ հոդվածի 1-ին մասով սահմանված պահանջները, ամփոփիչ հաշվետվությունները կներկայացվեն ՀՀ վերահսկիչ պալատի խորհրդի հաստատմանը, իսկ ԵԱՏՄ պետական ֆինանսական վերահսկողության բարձրագույն մարմինների կողմից համատեղ որոշումներով հաստատվելուց հետո, տասն օրվա ընթացքում, կներկայացվեն ՀՀ Ազգային ժողով, դրանց մասին տեղեկացնելով Հայաստանի Հանրապետության Նախագահին:

ԵԱՏՄ անդամ պետությունների բարձրագույն վերահսկողական մարմինների կողմից ԵԱՏՄ մարմիններում իրականացված արտաքին աուդիտի (հսկողության) արդյունքների վերաբերյալ Բարձրագույն խորհրդի որոշումն ընդունվելուց հետո հաշվետվությունները սահմանված կարգով կտեղադրվեն Վերահսկիչ պալատի ինտերնետային էջում: